

wolte mit Laugen außsüßen / so solte solches nicht
geschehen können / dann beyde widerwärtige Na-
turen / als Salis nitrosi, & acidi, einander entgegen
seyn / vnd kein Gemeinschaft oder Liebe zusammen
tragen. So man aber auff ein solches gesalzen
Fleisch oder Fisch / ein Wasser / darinn etwas von
deßgleichen Salz / damit das Fleisch eingesalzen
war / solviret ist / schüttet / so extrahiret solches
Salzwasser das Salz in dem Fleisch als seines
gleichen viel lieber auff / als ein gemein süß Was-
ser / darinnen kein Salz ist.

Also vnd auff solche Weiß / können auch die
allerhärteste Dinge / als ein Stein vnd Metallen
mit gemein Wasser conjungiret werden / davon
mehrs in meinen andern Büchern gehandelt
wird / vnd allhier nicht nöthig weiters davon zu
schreiben. Ist nur darumb ein wenig angerühret
worden / vmb zu beweisen / daß allezeit gleich mit
seines gleichen müsse extrahiret werden.

Es kan zwar ein contrarium das ander tödten /
vnd sein corrositet benehmen / dadurch die Schmer-
zen ein Zeitlang gelindert werden / daß aber auch
dadurch das malum solte benommen seyn / empfin-
den die jenigen / welche vnter solchem Schmier vnd
Suttelwerck ligen / mehr als ihnen lieb ist.

Allhier möchte jemand fürwerffen vnd sagen /
ich machte Vnterschied der Salien, vnd nennet
ein Theil sulphurisch / vnd das ander Theil mercu-
rialisch / da doch in beyden noch Sulphur noch Mer-
curius augenscheinlich gespüret wirdt / wahr ist es /
daß